



montrer moi, et pou moi personnellement mo pensé ki Allah (swt) ti enseigne dans même façon So bane serviteurs choisis dans le passé et mo demande zot tous pou écoute sa bane *duahs* là attentivement et dans zot lé cœur, zot dire, « *Ameen* ».

Allah fine ouvert mo l'esprit Li-même, fine éclaire mo l'esprit, mo lé cœur Li-même et fine mette sa bane kalité paroles extraordinaires là dans mo la bouche, pou mo adresse Li. Moi, mo nek ene mendiant devant la porte mo Maître. C'est par So grâce et So faveurs ki Li fine enseigne moi couma mo bizin adresse Li. Même si sa bane *duahs* là exister, ki mo pas ti conner, alors sa c'est ene grand faveur mo Maître ki Li pé enseigne sa bane kalités *duahs* extraordinaires là. Alors mo bizin bien reconnaissant envers mo Allah et mo bien chanceux ki Allah (swt) Li-même pé enseigne moi sa bane kalités *duahs* là. *Alhamdulillah*.

Ô Allah, mo bien faible, rempli de péchés ; tous les jours par bane faiblesses ki mo ena, mo faire péchés. Ô Allah, mo demande Toi pou lave moi de tous mo bane péchés, purifier moi de tous bane défauts ki mo ena, éprouve mo lé cœur par la piété des cœurs, Ô Toi Qui efface bane trébuchements de bane pécheurs.

Ô mo Seigneur! Mo péna confiance lors personne excepter Toi. Et mo pas faire plainte avec personne sauf avec Toi et péna aucaine l'autre refuge à part Toi et péna aucaine chose d'éclat à part To bane signes. Donc, si To fine envoie moi pou reforme To bane dimounes, bé avec To pouvoir sappe moi et donne moi To support pareil couma To donne To support à bane véridiques. Et si To content moi et si To ena l'amour pou moi, pas rejette moi couma bane égarés. Si To quitte moi, bé ki sanlà pou capave protège moi, car c'est Toi Le Plus Grand Protecteur de tous ; donc, éloigne mo bane difficultés et pas donne l'occasion à mo bane l'ennemis pou moque, ridiculise moi et aide moi contre bane peuples incroyants.

Ô Allah! Couma est-ce ki nous pou remercier Toi pou To bane faveurs ? To fine réduire bane malfaiteurs zot la haine, l'arrogance ki zot fine montrer pou To *Deen* (Islam) kot zot fine martirize, persécute nous bane frères et sœurs ki croire dans To l'Unicité, To fine réduire zot (sa bane malfaiteurs là) zot fiertés, zot l'arrogance en poussières. To fine faire zot vine impuissants devant To manifestation puissant et nous fine témoigne sa avec nous propres liziés.

Ô Allah! Le Très Miséricordieux! Nous l'âme témoigner ki pareil couma To fine faire dans l'époque Nuh (as), kot To fine détruire beaucoup dimounes et après To fine ena pitié, donc pardonne tous bane dimounes lors sa la terre là. Si To continuer détruire zot, ki sanlà pou reconnaître, croire et amène la foi dans To bane signes et dans To Serviteur Choisi et pou prier Toi, pou cherche To pardon.

Ô Allah sappe zot tous avec bane grands, grands destructions ki pé vini.

Ô Allah, Le Puissant! Pareil couma To fine dire à To bane serviteurs ki To pou avec zot dans tous zot bane épreuves, dans tous zot terrains et To fine aide zot lors chaque stage, et contre chaque opposant ; To fine aide zot avec le Saint Esprit.

Ô Allah, Le Puissant! Mo demande To l'aide contre tous bane épreuves et aide moi lors chaque stage et contre chaque opposant et aide moi avec le Saint Esprit et faire ki chaque décision ki mo prend pou To Jamaat et To *Deen-e-Islam* dans so l'ensemble, ainsi ki l'humanité, c'est To même ki guide moi pou prend sa bane décisions là.

Ô Mo Seigneur! Ô Mo Seigneur! Écoute mo *duahs* à propos de mo peuple – tous bane Mauriciens et toute l'humanité dans so l'ensemble – et mo bane supplications à propos de mo bane frères [bane musulmans]. Mo prend le nom de To prophète (saws), *Khataman-Nabiyyin*, celui ki intercéder, et à travers li, mo demande Toi : **Ô Mo Seigneur! Tire zot dans l'obscurité et risse zot avec To la lumière. Et tire zot de sa distance-là et amène zot près.**

Ô Allah! Bane dimounes ki envoie malédictions lors moi, gagne pitié lors zot, bane dimounes ki fine mette blâmes lors moi, sauve zot de sa destruction ki pou vine de Toi.

Ô mo Allah mette la droiture dans profondeur de zot lé cœur et ignore zot bane erreurs et zot péchés et pardonne zot et donne zot la paix et garde zot en sécurité. Et donne zot bane telles lizié avec ki zot capave trouver, et donne zot bane telles zoreilles avec ki zot capave tender, et donne zot bane tels lé cœurs avec ki zot capave comprendre, et donne zot ene tel l'éclairage avec ki zot capave faire la distinction entre la vérité et fausseté, et gagne pitié lors zot et tout séki zot dire lors moi, Ô Allah, agir avec souplesse lors là, parski zot bane tels dimounes ki pas conner et zot ignorants.

Ô Allah! To fine montrer moi même *duah* ki To Nabi Kareem Hazrat Muhammad (saws) ti pé faire : « **Rabbe ahde kawmi fa 'innahoum laa yaalamoun.** »

[Mo donne ene ti explication lors sa *duah* là. Hazrat Muhammad (saws) ti pé faire sa *duah* là, pou bane ki faire mauvais par exprès, et sa *duah* ki Hazrat Muhammad (saws) fine faire là, li pas dans zot faveurs sa (c.à.d., bane mauvais ki zot faire par exprès là).

Pou sa bane mauvais là, Hazrat Muhammad (saws) ti pé faire sa *duah* là: « **Allahoumma sahoukoum tashika walaa tazar al ardze minal Kaafiriina Sharira.** » C'est-à-dire, bane ki « **Sharir** » parmi zot, bane ki faire mauvais par exprès, concernant zot, ena sa *duah* de destruction là pou zot.]

Ô Mo Maître! Maître de Muhammad Mustapha (saws) et de tous bane croyants sincères ki au courant de To Grand Stage, bane ki reste éveiller dans la prière dans la nuit et bane ki faire *Jihad-e-Nafs* le jour, et bane voyageurs ki prépare zot la nuit pour repentir pou tous zot péchés, Ô Allah! C'est mo bane frères sa, pardonne zot, faire zot reformer et ouvert zot lizié et illumine zot lé cœur, et faire zot comprend tout c'est ki To fine montrer moi. Faire zot reconnaître sa humble serviteur ki To fine envoyer dans sa siècle là, comme le Revivificateur, le *Mohyuddin*, et le *Khalifatullah*, To propre Représentant lors sa la terre là ki pou montrer zot sa ki To bien-aimé prophète (saws) ti apporter et ti montrer ; c'est le même chemin kot sa chemin là fine endommager, et mo fine vini pou répare sa même chemin là, afin ki zot pas tombe dans trou de l'obscurité, et afin pou dirige zot dans le chemin ki pou amène zot tous vers Toi avec *Taqwa* et kot zot gagne ene bon récompense avec Toi, ki To satisfait avec zot et zot satisfait avec zot rencontre avec Toi, le Jour ki zot pou présente devant Toi.

Ô Maître de bane créatures! To ena tout pouvoirs, dévotion ; kot la vérité pé vine en poussière, montrer ene tel signe pou ki tous bane créatures prend le chemin de la vérité. Ô Allah! Faire tous bane malentendus, tous débats, tous divergences fini, faire zot tous unir sous l'Unicité de Dieu [To l'Unicité] et To bane Messagers Choisis.

Ô mo Allah! Mo Bien-aimé! To Joli Regard couma ene l'épée bien fité, avec ki élimine bane la peines ki bane *Ghayrs* cause nous. Nous fine vine en poussières

pou joiné Toi, afin ki sa la peine ki gagner kan séparer là, ena ene l'effet lors Toi. Sans Toi ene moment aussi mo pas gagne la paix. Pareil couma ene malade so lé cœur batté. Coumsa même mo la vie batté. Jette ene regard lors moi, Ô Allah! Guette ene coup ki sanlà pé faire tapage kot Toi, faudrait pas li coumsa ki ene quelqu'un ki fine amoureux de Toi, alle assassiner.

Ô bane frères et sœurs! Celui ki mélange dans la poussière, l'heure-là Allah, Li joiné li, sinon dans aucaine conte pas trouver même ene zaffaire extérieure. Li vine pou celui ki vine pour Li. Celui ki courber devant Li, c'est li-même ki vine dans So refuge.

Guette bane fleurs, c'est à cause zot même ki ena l'éclat, ena beauté, et c'est avec zot la lumière-même ki le soleil et la lune éclairé.

**Ô Allah! Montre nous To beauté, jusqu'à kan To visage pou reste cacher?** (C'est-à-dire, mo pé rode dire : **Allah montre zot aussi To visage, sa Visage ki fine faire moi, vine ene amoureux de Toi, montré zot aussi To visage**). *Insha-Allah, Ameen.*

Pou azordi mo arrête là-même. Ki Allah (swt) donne moi le *Tawfiq* pou continuer sa bane jolie *duahs* là, la semaine prochaine. *Insha-Allah.*